

**Dumonda Caviezel (Cuira) concernent l'auta quota da vaccinaziun respectivamain l'ambiziun da daventar
«champion svizzer da vaccinaziun»**

Igl è incontestà che la pandemia po vegnir dumagnada a lunga vista mo, sch'ina gronda part da la populaziun è vaccinada. Actualmain curra la campagna da vaccinaziun grischuna cun tutta forza. Gia var 40% da las Grischunas e dals Grischuns han survegnì almain l'emprima dosa dal vaccin (stadi da mez zercladur 2021). Actualmain è la dumonda anc adina pli gronda che la purschida. Ma i dat indizis en Svizra che las annunzias chalan plaunsieu, il pli tard sunter las vacanzas da stad vegnan a star a disposiziun dapli dosas dal vaccin che persunas che vulan sa laschar vaccinar.

En vista a las variantas fitg contagiusas ed immunevasivas (en spezial B.1.617.2 – delta) exista la ristga ch'erupziuns pli grondas sa mussian puspè il tard atun/l'enviern. Cun in sguard sin la sanadad da la populaziun e sin l'economia stoi vegnir fatg tut, per ch'ìls dumbers da cas na s'augmentian mai pli fermamain. Experientschas d'auters pajais e calculaziuns da model mussan che quai po vegnir cuntanschì mo cun ina quota da vaccinaziun fitg auta (>80%) da las persunas che pon vegnir vaccinas (>12 onns).

Fitg legraivel èsi ch'il Grischun po cumprovar – cun ina quota da vaccinaziun da circa 85% da las persunas da la classa da vegliadetgna 70+ – ina da las quotas las pli autas da la Svizra. La prontezza da sa laschar vaccinar è però cleramain pli bassa tar la populaziun pli giuvna. Mo sch'igl ans gartegia d'immunisar er quella en moda cumplexsiva, pudain nus tegnair ils dumbers da cas circa sin nulla. En il focus ston vegnir prendidas en quest connex en spezial quellas persunas ch'èn anc indecisas u malsegiras. En auters pajais èn vegnidas e vegnan empruvadas differentas soluziuns creativas per cuntanscher questas persunas.

Ord vista da las explicaziuns menziunadas tschentan las sutsegnadras ed ils sutsegnaders las suandantas dumondas:

1. En tge gruppas da vegliadetgna ed en tge regions è la quota da persunas vaccinas anc sut la media?
2. Tge planisescha la Regenza – ultra da las mesiras da la Confederaziun – per auzar la quota da persunas vaccinas l'atun sin in nivel fitg aut (analogamain a la classa da vegliadetgna 70+) tar tut las gruppas da la populaziun?
3. La Regenza grischuna e l'administraziun han demussà spiert da piunier cun lantschar ad ura ils tests da massa ed èn – sco «champion svizzer da tests» – daventadas il model per auters chantuns en la pandemia dal coronavirus. L'effect da quest proceder innovativ ha pudì vegnir confermà pliras giadas scientificamain. È la Regenza puspè pronta d'augmentar a lunga vista la quota da persunas vaccinas cun agid da metodos creativas che sa basan sin la scienza e da daventar «champion svizzer da vaccinaziun»?

Tavau, ils 16 da zercladur 2021

Caviezel (Cuira), Hohl, Buchli-Mannhart, Atanes, Baselgia-Brunner, Berweger, Brunold, Cantieni, Casutt-Derungs, Degiacomi, Deplazes (Rabius), Dürler, Epp, Gartmann-Albin, Geisseler, Hardegger, Hartmann-Conrad, Hofmann, Horrer, Kohler, Loepfe, Michael (Donat), Müller (Felsberg), Noi-Togni, Papa, Perl, Preisig, Rettich, Ruckstuhl, Rutishauser, Salis, Schwärzel, Ulber, von Ballmoos, Widmer (Favugn), Widmer-Spreiter (Cuira), Wilhelm, Bürgi-Büchel, Spadarotto, Stieger, Tomaschett (Cuira)